

Missingiut

## **Meeqqat pillugit inatsisip Kalaallit Nunaannut atuutilersinneqarnissaanik peqqussut**

UAGUT MARGRETHE AAPPAAT, Guutip Saammaanneranit Danmarkip Dronngia, nalunaarpugut:

Meeqqat pillugit inatsimmi § 38<sup>1</sup> naapertorlugu, tak. inatsit nr. 407, 7. juni 2001-imeersoq, toqusumik misissuineq, toqungasut timaannik nakorsatut misissuineq aamma timip ilaanik nuussineq il.il. pillugit aamma meeqqat pillugit inatsimmi inatsisip (Naartuersinnerup aamma toqungasumik erninerup akornanni killissamik allannguineq aamma meeqqanut toqungallutik inunngortunut ataataassutsimik nalunaarsuinnermut maleruagassanik pisariillisaaneq) allanngortinneqarnera pillugu inatsimmi nr. 133 2. marts 2004-meersumi § 4<sup>2</sup>, pisortani oqartussanut qinnuteqaatit, nalunaarutiginninnerit, qinnuteqaatiginninnerit, nalunaarutit aamma nalunaarutit erklæringit pillugit (Aningaasaqarnikkut akeqanngitsumik inissamut tapiissutinik qinnuteqaatit, nakorsamik toqqaanermik nalunaarutit, atsiinissamik atinillu allanngortitsineq pillugit qinnuteqaatit, ataataassutsimut uppersaammik tunniussineq, sikkiliniq tillittoqarsimaneranik nalunaarutiginninnerit il.il. eqqarsaatigalugit innuttaasunut digitalimik pinngitsoorani imminut sullittussaannermut ikaarsaariarneq) pillugit inatsisini aalajangersakkanik allanngortitsineq pillugu inatsimmi nr. 622, 12. juni 2013-imeersumi § 19, imm. 3<sup>3</sup>, meeqqat pillugit inatsisip, meeravissartaartarneq pillugu inatsisip, eqqartuussisarnermut inatsisip inatsisillu assigiinngitsut allat (Anaanaqataassuseq il.il.) allanngortinneqarnerat pillugu inatsimmi nr. 652, 12. juni 2013-imeersumi § 10, imm. 2,<sup>2</sup>, passunneqarnermut, naappaammik suussusersiinnermut ilisimatusarnermullu il.il. inatsimmi nr. 1313 27. november 2013-imeersumi § 8, imm. 3,<sup>3</sup> ikkussivigineqarnikkut naartulersinneqarneq pillugu inatsisip, timip ipiutaasartai pillugit inatsisip, meeqqat pillugit inatsisip, meeqqat pilersorneqarnissaannik inatsisip aamma eqqartuussisarnermut inatsisip (Kinguaassiorsinnaanermut ikiorneqarneq oqariartaatsini atorineqartutut, mannessanik toqortarinnittarnerup sivissusua pillugu immikkut akuerineqarnissamut periarfissaq, passunneqarnissamut akuerineqarneq kiisalu pisunik kissaatigineqanngitsunik aamma kingunerluutinik sualuttunik ilalisaatitigut nappaatitit ilusilinnik il.il. nalunaarutiginnittarnermut akisussaasut amerlineqarnerat) allanngortinneqarnerat, katissimasutut aappariinnermik pilersitsisarneq aamma atorunnaarsitsisarneq pillugit inatsisini aalajangersakkanik assigiinngitsunik allanngortitsinerit pillugit aamma meeqqat pillugit inatsimmik allanngortitsineq (nakuuserneq aamma kinguaassiuutitigut innarliineq avinnermut pissutissatut il.il.) pillugit inatsimmi nr. 485 21. maj 2014-imeersumi § 4<sup>4</sup>, pisortani oqartussanut qinnuteqaatit, nalunaarutiginninnerit, nalunaarutit, qinnutiginninnerit aamma nalunaarutit pillugit inatsisini aalajangersakkanik assigiinngitsunik (sanaartornissamut akuersissutinik qinnuteqarneq, angajoqqaatut oqartussaassutsimik qinnuteqarneq, meeqqap najugaa, peqatiginninneq il.il., averusernissamut avinnissamillu qinnutiginninnerit, meeqqamut katissimasatullu aapparissamut akilersuutinik qinnuteqaatit, ineqartup akileeqaataassutissaanut taarsigassarsinissamik qinnuteqaatit, biilit unittarfianni uninngatitsinissamut akuersissummik qinnuteqarneq aamma Qitiusumik Inuit Nalunaarsorsimaffiat il.il. pillugu inatsit malillugu atsiorlugit uppersaatinik qinnutiginninneq eqqarsaatigalugit innuttaasunut digitalimik pinngitsoorani imminut sullittussaannermut ikaarsaariarneq) allanngortitsinerit pillugit inatsimmi nr. 552 2. juni 2014-imeersumi § 17, imm. 3,<sup>5</sup>, ilaqutariinnut inatsisinut tunngasuni naammagittaalliuteqarsinnaaneq aamma piginnaasat il.il. pillugit aalajangersakkanik assigiinngitsunik allannguineq (Ankestyrelsen ilaqutariinnut inatsisinut tunngasuni naammagittaalliuteqartarfittut il.il.) pillugu inatsimmi nr. 1741 22. december 2015-imeersumi § 14, imm. 3,<sup>6</sup>, angajoqqaat akisussaaneq pillugu inatsisip, katissimasutut aappariilersarneq aamma atorunnaarsitsisarneq pillugu inatsisip inatsisillu assigiinngitsut allat (Famileretshuset pillugu inatsisip allanngortinneqarnerata aamma angajoqqaat akisussaaneq pillugu inatsit malillugu suliani meeqqat illersorneqarnissaannik isiginninnerup annertusineqarnerata malitsigisaannik allanngortitsinerit) allanngortinneqarnerat pillugu

inatsimmi nr. 1711 27. december 2018-imeersumi § 44, imm. 4,<sup>7</sup>, angajoqqaat akisussaannerat pillugu inatsisip, Familieretshuset pillugu inatsisip, katissimasutut aappariilersarneq atorunnaarsitsisarnerlu pillugu inatsisip inatsisillu assigiinngitsut allat (Pinngitsaalisamik avitseqatigiiffiusumik najugaqatigiittussaanerup atorunnaarsinneqarnera aamma ilaqutariinnut inatsiseqartitsinerup nutaap pilersinneqarnerata malittareqqinneqarnera il.il.) allannortinneqarnerat pillugu inatsimmi nr. 962 26. juni 2020-meersumi § 14, imm. 2,<sup>8</sup> aamma meeqqat pillugu inatsisip, atsiisarnermut inatsisip inatsisillu assigiinngitsut allat (Anaanaqataassutisimik nalunaarsuisarnermik eqaallisaaneq, inuit allaasumik suaassuseqartut angajoqqaajusarnerannik aalajangersaaneq aamma inuit allaasumik suaassuseqartut aqqinik allannortitsisarneq il.il.) allannortinneqarnerat pillugu inatsimmi nr. 227 15. februar 2022-meersumi § 9, imm. 2, 1. pkt.,<sup>9</sup> malitsigisaannik aalajangersarneqarpoq, meeqqat pillugit inatsit Kalaallit Nunaannut atuutissasoq tulluuttuni ima oqaasertaqarluni:

## Kapitali 1

### *Erninermut atatillugu ataataassutisimik nalunaarsuineq*

**§ 1.** Meeraq arnamit angummut katissimasumit erniarineqarpat, aappaasoq meeqqamut ataataasutut isigineqassaaq, taamaattorli tak. imm. 2. Ataataassutisimik nalunaarsuineq suliarineqassaaq palasimit allattaavissuarnut allattuisuusumit meeqqap inunngornerata nalunaarsorneqarneranut atatillugu.

*Imm. 2.* Imm. 1-imi aalajangersagaq atuutissanngilaq

- 1) aappariit meeqqap inunngornerani averusersimappata,
- 2) anaanaasoq meeqqap inunngornissaa sioqqullugu qaammatini kingullerni qulini allamik katissimasamik aappaqarsimappat imaluunniit averusersimanani nalunaarsugaasumik aappaqarsimappat imaluunniit
- 3) aappariit marluullutik ataataassarsiuussinermik suliamik pilersitsitsoqarnissaa qinnutigippassuk.

*Imm. 3.* Imm. 1-imi aalajangersagaq assingusumik atuutissaaq, katissimasatut aapparisaq meeqqap inunngornissaa sioqqullugu qaammatit kingulliit qulit iluanni toqusimappat.

*Imm. 4.* Imm. 3-mi aalajangersagaq, tak. imm. 1, atuutissanngilaq

- 1) aappariit toqusoqarnerata nalaani averusersimappata,
- 2) anaanaasoq meeqqap inunngornissaa sioqqullugu qaammatini kingullerni qulini allamik katissimasamik aappaqarsimappat imaluunniit averusersimanani allamik nalunaarsugaasumik aappaqarsimappat imaluunniit
- 3) anaanaasup ataataassarsiuussinermik suliamik pilersitsitsoqarnissaa qinnutigippagu.

**§ 1 a.** Meeraq arnamit arnamut katissimasumit imaluunniit arnamik nalunaarsugaasumik aappaqartumit erniarineqarpat, anisuumik tunisisoq meeqqamut ataataasutut nalunaarsorneqassaaq, § 27 a, imm. 1 imaluunniit 3-mi, piunasaqaatit naammassineqarsimappata, taamaattorli tak. imm. 3. Ataataassutisimik nalunaarsuineq suliarineqassaaq palasimit allattaavissuarnut allattuisuusumit meeqqap inunngornerata nalunaarsorneqarneranut atatillugu.

*Imm. 2.* Imm. 1-imi aalajangersagaq assingusumik atuutissaaq, anisuumik tunisisoq meeqqap inunngornera sioqqullugu toqusimappat, kisiannili anaanaasoq ikiorneqarluni naartulernissamut passunneqareersimappat imaluunniit assingusumik passunneqareersimappat imaluunniit anisuumik ikkussivineqarsimappat.

*Imm. 3.* Imm. 1 aamma 2-mi aalajangersakkat atuutissanngillat

- 1) anaanaasoq meeqqap inunngornera sioqqullugu qaammatit kingulliit qulit iluanni arnamit § 27 imaluunniit § 27 a, imm. 1 imaluunniit 3 naapertorlugit akuersissuteqarsimasumit allaasumut katissimasimappat imaluunniit averusersimanani allamik nalunaarsugaasumik aappaqarsimappat imaluunniit
- 2) illuatungiusoq, § 27 a-mi pineqartoq, ataataassutisimik imaluunniit anaanaassutisimik suliamik pilersitsitsoqarnissaanik qinnuteqarpat.

**§ 2.** Meeraq arnamit katissimangitsumit erniarineqarpat, angut meeqqamut ataataasutut isigineqassaaq, taanna anaanaasorlu allakkatigut nalunaarpata, peqatigiillutik meeqqamut isumassuineramik akisussaaffimmillu isumaginnikkumallutik. Ataataassutisimik nalunaarsuineq suliarineqassaaq palasimit allattaavissuarnut allattuisuusumit meeqqap inunngornerata nalunaarsorneqarneranut atatillugu.

*Imm. 2.* Meeraq toqungalluni erniarineqarsimappat imaluunniit meeqqap inunngorneranik nalunaarsuineq sioqqullugu toqusimappat, angut meeqqap erniarineqarneranik nalunaarsuineranut atatillugu meeqqamut ataataasutut nalunaarsorneqarsinnaavoq, taanna anaanaasorlu allakkatigut nalunaarpata, taassuma ataataasutut nalunaarsorneqarnissaa kissaatigigitsik.

*Imm. 3.* Imm. 1 aamma 2-mi aalajangersakkat atuutissanngillat

- 1) anaanaasoq meeqqap inunngornissaa sioqqullugu qaammatit kingulliit qulit iluanni allamik katissimasaminik aappaqarsimappat imaluunniit averusersimanani nalunaarsugaasumik aappaqarsimappat imaluunniit
- 2) piffissami nalunaarutiginniffiusumi illuatungeriinni ataaseq imaluunniit marluullutik oqartussaassuseqanngippata imaluunniit angajoqqaatut oqartussaassulimmit akisussaaffigineqarpata.

**§ 3.** § 14, imm. 1, imm. 2, nr. 1, imaluunniit imm. 4, nr. 1, malillugit ataataassuseq meeqqap inunngornera sioqqullugu akuerineqarsimappat, tamanna tunngavigalugu meeqqap inunngorneranut atatillugu palasimit allattaavissuarnut allattuisuusumit nalunaarsorneqassaaq.

## Kapitel 1 a

### *Ernineranut atatillugu anaanaqataassutsimik nalunaarsuineq*

**§ 3 a.** Meeraq arnamit arnamut katissimasumit imaluunniit arnamik nalunaarsugaasumik aappaqartumit erniarineqarsimappat, katissimasatut aappaasoq imaluunniit aappaasoq meeqqamut anaanaqataasutut isigineqassaaq, taamaattoq takuuk imm. 2. Anaanaqataassutsimik nalunaarsuineq meeqqap inunngorneranut atatillugu palasimit allattaavissuarnut allattuisuusumit suliarineqassaaq.

*Imm. 2.* Imm. 1-imi aalajangersagaq atuutissanngilaq

- 1) katissimasatut aappariiusut imaluunniit nalunaarsugaasumik aappariiusut meeqqap inunngornerani averusersimappata,
- 2) anaanaasoq meeqqap inunngornissaa sioqqullugu qaammatini kingullerni qulini averusersimanani angummik allamik imaluunniit arnamik allamik katissimasaminik aappaqarsimappat,
- 3) anaanaasoq ikiorneqarluni kinguaassiornissamik passunneqarsimappat imaluunniit assingusumik passunneqarsimappat imaluunniit angutip ilisimaneqartup anisuuani ikkussivigineqarsimappat, angutillu taassuma ataataasutut isigineqarnissaanut piumasaqaatit § 27 a, imm. 1 imaluunniit 3-miittut naammassineqarsimappata, imaluunniit
- 4) imaluunniit katissimasatut aappariit marluullutik imaluunniit nalunaarsugaasumik aappariit marluullutik qinnuteqarpata, ataataassarsiuussinermit imaluunniit anaanaqataassutsimik suliamik pilersitsisoqarnissaanik.

*Imm. 3.* Imm. 1-imi aalajangersagaq assingusumik atuutissaaq, katissimasatut aappaasoq imaluunniit nalunaarsugaasumik aappaasoq meeqqap inunngornera sioqqullugu qaammatit kingulliit qulit iluanni toqusimappat, taamaattoq tak. imm. 4.

*Imm. 4.* Imm. 3-mi aalajangersagaq, tak. imm. 1, atuutissanngilaq

- 1) katissimasatut aappariit imaluunniit nalunaarsugaasumik aappariit toqusoqarnerata nalaani averusersimappata,
- 2) anaanaasoq meeqqap inunngornissaa sioqqullugu qaammatini kingullerni qulini angummik imaluunniit arnamik allamik katissimasamik imaluunniit averusersimanani imaluunniit
- 3) anaanaasup ataataassarsiuussinermit imaluunniit anaanaqataassutsimik suliamik pilersitsisoqarnissaa qinnutigippagu.

**§ 3 b.** Meeraq arnamit katissimannngitsumit erniarineqarpat, arnaq meeqqamut anaanaqataasutut isigineqassaaq, taanna anaanaasorlu allakkatigut nalunaarpata, peqatigiillutik meeqqamut isumassuinermit akisussaaffimmillu isumaginnikkumallutik, taamaattoq tak. imm. 3. Anaanaqataassutsimik nalunaarsuineq suliarineqassaaq palasimit allattaavissuarnut allattuisuusumit meeqqap inunngornerata nalunaarsorneqarneranut atatillugu.

*Imm. 2.* Meeraq toqungalluni erniarineqarsimappat imaluunniit meeqqap inunngorneranik nalunaarsuineq sioqqullugu toqusimappat, arnaq meeqqap erniarineqarneranik nalunaarsuineranut atatillugu meeqqamut anaanaqataasutut nalunaarsorneqarsinnaavoq, taanna anaanaasorlu allakkatigut nalunaarpata, taassuma anaanaqataasutut nalunaarsorneqarnissaa kissaatigigitsik, taamaattoq tak. imm. 3

*Imm. 3.* Imm. 1 aamma 2-mi aalajangersakkat atuutissanngillat

- 1) anaanaasoq meeqqap inunngornissaa sioqqullugu qaammatini kingullerni qulini averusersimanani angummik allamik imaluunniit arnamik allamik katissimasaminik aappaqarsimappat imaluunniit nalunaarsugaasumik aappaqarsimappat,
- 2) anaanaasoq ikiorneqarluni kinguaassiornissamik passunneqarsimappat imaluunniit assingusumik passunneqarsimappat imaluunniit angutip ilisimaneqartup anisuuani ikkussivigineqarsimappat, angutillu taassuma ataataasutut isigineqarnissaanut piumasagaatit § 27 a, imm. 1 imaluunniit 3-miittut naammassineqarsimappata, imaluunniit
- 3) piffissami nalunaarutiginniffiusumi illuatungeriinni ataaseq imaluunniit marluullutik oqartussaassuseqanngippata imaluunniit angajoqqaatut oqartussaassulimmit akisussaafigineqarpata.

**§ 3 c.** § 14, imm. 1 malillugu anaanaqataassuseq meeqqap inunngornera sioqqullugu akuerineqarsimappat, tamanna tunngavigalugu meeqqap inunngorneranut atatillugu palasimit allattaavissuarnut allattuisuusumit nalunaarsorneqassaaq.

## Kapitali 2

### *Naalagaaffiup Sinniisuani ataataassutsimik anaanaqataassutsimillu suliamik suliarinnineq*

#### *Suliamik aallartitsineq*

**§ 4.** Meeqqap inunngornissaa sioqqullugu suliaq anaanaasumit imaluunniit Naalagaaffiup Sinniisuani aallartinneqarsinnaavoq.

**§ 5.** Ataataassuseq imaluunniit anaanaqataassuseq kapitali 1 imaluunniit 1 a malillugit Naalagaaffiup Sinniisuani akuerineqarsimappat, meeqqap inunngorneranit qaammatit arfinillit qaangiutsinnagit suliaq anaanaasumit, ataataasumit, anaanaqataasumit imaluunniit meeqqamut angajoqqaatut oqartussaassulimmit aallartinneqarsinnaavoq.

*Imm. 2.* Ataataassuseq §§ 1 imaluunniit 1 a malillugit nalunaarsorneqarsimappat, imaluunniit anaanaqataassuseq § 3 a malillugu nalunaarsorneqarsimappat, piffissaliussap assingata iluani suliaq ataataasup imaluunniit anaanaqataasup toqusutut pigisaanik isumaginnittuinit aallartinneqarsinnaavoq, ataataasoq imaluunniit anaanaqataasoq meeqqamik pigisamisut akuerinnissimasutut isigineqarsinnaasimangippata.

**§ 6.** Angut anaanaasup piffissami naartulerfigisaani kinguaassiuutitigit atoqateqarsimasoq meeqqamut ataataanermi misilinneqartinnissaanut pisinnaatitaaffeqarpoq, taamaattoq tak. imm. 2 aamma § 10. Tamatuminnga qinnutiginnineq allakkatigit pissaaq meeqqallu inunngorneranit qaammatit arfinillit qaangiutsinnagit saqqummiunneqassaalluni, piffissap qinnutiginniffiusup nalaani ataataassuseq imaluunniit anaanaqataassuseq pillugu suliamik ingerlatsisoqarsimangippat.

*Imm. 2.* Angut meeqqap ataataatut nalunaarsorneqarsimappat, imaluunniit arnaq meeqqamut anaanaqataasutut nalunaarsorneqarsimappat, imm. 1, jf. taamaattoq §§ 6 a aamma 6 b, malillugu ataataassutsimik suliamik pilersitsisoqarsinnaanngilaq. Taamaattoq 1. pkt. apeqquaatinnagu angut ataataassutsimik suliamik pilersitsisinnaavoq, piffissami anaanaasup naartulerfigisaani anaanaasumut averusersimanani katissimaguni imaluunniit taassuminnga aalajangersimasumik inooqateqarsimaguni.

**§ 6 a.** Angut imaluunniit arnaq, §§ 27, 27 a imaluunniit 27 b malillugit akuersisimasoq imaluunniit nalunaarutiginnissimasoq, ataataassutsimik imaluunniit anaanaqataassutsimik suliamik pilersitsisinnaavoq. § 6, imm. 1, 2. pkt., assingusumik atuutissaaq.

**§ 6 b.** Angut, meeqqap inunngornissaa sioqqullugu qaammatit kingulliit qulit iluanni averusersimanani anaanaasumut katissimasimasoq, meeqqap inunngornera pillugu sapinngisamik piaartumik allakkatigit nalunaarfigineqassaaq ataataassarsiuussinermik suliamik aallartitsisinnaanermik iltersuutitalimmik. Tamannali atuutissanngilaq suliami illuatungiusooreersimappat.

*Imm. 2.* Arnaq, meeqqap inunngornissaa sioqqullugu qaammatit kingulliit qulit iluanni averusersimanani anaanaasumut katissimasimasoq imaluunniit nalunaarsugaasumik aappaasimasoq, meeqqap inunngornera pillugu sapinngisamik piaartumik allakkatigit nalunaarfigineqassaaq anaanaqataassutsimik suliamik

aallartitsinnaanermik ilitsersuutitalimmik. Tamannali atuutissanngilaq arnaq suliami illuatungioreersimappat.

**§ 7.** Ataataassuseq imaluunniit anaanaqataassuseq meeqqap inunngorneraniit sapaatip-akunnerisa sisamat iluanni nalunaarsorneqarsimanngippat, allanillu suliamik aallartitsisoqarsimanngippat, Naalagaaffiup Sinnisua suliamik aallartitsissaaq, taamaattoq tak. imm. 2.

*Imm. 2.* Meeraq toqusimappat, ataataassuseq imaluunniit anaanaqataassuseq taamaallaat aalajangersartinniarneqarsinnaavoq, anaanaasoq imaluunniit alla, tamatuminnnga inatsisisitigut soqutigisaqartoq, tamanna pillugu qinnutiginnippat.

#### *Suliamik suliarinnineq*

**§ 8.** Anaanaasup ilisimatitsissutigissavaa, meeqqamut kina ataataanersaq imaluunniit meeqqamut kina ataataasinnaanersaq. Ilanngullugu ilisimatitsissutigissavaa, kinguaassiorsinnaanermut ikiorneqarluni passunneqarsimanerluni imaluunniit assingusumik passunneqarsimanerluni, imaluunniit anisuumik ikkussivigineqarsimanerluni, meeraq taamatut passunneqarnikkut imaluunniit anisuumik ikkussivigineqarnikkut naartorineqalersimasinnaappat, taamalu pisoqarsimappat ilisimatitsissutigissallugu, passussinermut imaluunniit anisuumik ikkussivigineqarnermut kina akuersisimanersaq. Imm. 2-4 atuutisneqarsimappata 1. aamma 2. pkt. atuutissanngillat.

*Imm. 2.* Ataataassutsimik imaluunniit anaanaqataassutsimik § 14, imm. 1 malillugu akuersissutiginnittoqarsimappat imm. 1-imi aalajangersagaq atuutissanngilaq.

*Imm. 3.* Ataataassuseq kapitali 1 malillugu nalunaarsorneqarsimappat, imaluunniit ataataassuseq meeqqat inunngornerata kingorna § 14, imm. 1 malillugu akuersissutigineqarsimappat, imm. 1 taamaallaat atuutissaaq, aalajangersarneqarpat imaluunniit pingaarutilimmik sakkortusineqartumik ilimanarsisinneqarpat, angut meeqqap ataataatut nalunaarsorneqarsimasoq, imaluunniit ataataassutsimik akuersissutiginnissimasoq, meeqqamut ataataanngitsoq, taamaattoq tak. imm. 4.

*Imm. 4.* Anaanaasoq kinguaassiorsinnaanermut ikiorneqarluni passunneqarsimappat imaluunniit assingusumik passunneqarsimappat, imaluunniit anisuumik ikkussivigineqarsimappat, aamma ataataassuseq imaluunniit anaanaqataassuseq kapitali 1 imaluunniit 1 a malillugu nalunaarsorneqarsimappat, imaluunniit ataataassuseq imaluunniit anaanaqataassuseq § 14, imm. 1 malillugu akuersissutigineqarsimappat, imm. 1 taamaallaat atuutissaaq, meeqqap taamatut passunneqarnikkut imaluunniit anisuumik ikkussivigineqarnikkut naartorineqalersimannginnera pingaarutilimik sakkortusineqartumik ilimanarsisinneqarpat.

*Imm. 5.* Anaanaasoq paasissutissanik imm. 1-imi pineqartunik tunniussaqaanngippat, tamatuma inuttaanut meeqqamullu qanoq isumaqarsinnaaneranik ilitsersorneqassaaq.

**§ 9.** Suliamut attuumassuteqartut tassaapput

- 1) meeraq imaluunniit taassuma toqusutut pigisaanik isumaginnittoq,
- 2) anaanaasoq imaluunniit toqusutut pigisaanik isumaginnittoq,
- 3) angut, ataataasutut nalunaarsorneqarsimasoq imaluunniit ataataassutsimik akuersissutiginnissimasoq, imaluunniit taassuma toqusutut pigisaanik isumaginnittoq,
- 4) angut, anaanaasup paasissutissiinerata kingorna meeqqamut ataataasoq imaluunniit meeqqamut ataataasinnaasoq, tak. § 8, imaluunniit taassuma toqusutut pigisaanik isumaginnittoq,
- 5) angut, meeqqamut ataataanermi misilinneqarnissaanik pisinnaatitaaffeqartoq, tak. §§ 6 imaluunniit 6 a, imaluunniit taassuma toqusutut pigisaanik isumaginnittoq,
- 6) arnaq, anaanaqataasutut nalunaarsorneqarsimasoq imaluunniit anaanaqataassutsimik akuersissutiginnissimasoq, imaluunniit taassuma toqusutut pigisaanik isumaginnittoq aamma
- 7) arnaq, meeqqamut anaanaqataanermi misilinneqarnissaanik pisinnaatitaarrfeqartoq, tak. § 6 a, imaluunniit taassuma toqusutut pigisaanik isumaginnittoq.

*Imm. 2.* Anaanaasoq toqusimappat, Naalagaaffiup Sinnisua meeqqamut angajoqqaatut oqartussaassuseqartup qinnuiginninneratigut angummik imaluunniit arnamik attuumassuteqartut akuliutsississaaq, ilimanarsisinneqarsinnaappat, angut meeqqamut ataataasoq imaluunniit meeqqamut ataataasinnaasoq, imaluunniit arnaq meeqqamut anaanaqataasoq imaluunniit meeqqamut anaanaqataasinnaasoq.

**§ 10.** Meeraq pissutsit pillarneqaataasinnaasut aqutugalugit naartorineqalersimappat, angut, pissutsinik iliuuserinnissimasoq, meeqqamut ataatanngorsinnaangilaq, meeqqamik eqqumaffiginninnerit aalajangiisuusut tamatumunnga akerliuppata.

**§ 11.** Naalagaaffiup Sinniisuata anaanaasoq angutillu, suliamut attuumassuteqartuusut, inatsisitigut ilalisaatinik misissuinerlut peqataaqqullugit kaammattussavai, tamanna suliamut pingaaruteqarsinnaappat.

*Imm. 2.* Imm. 1-imi aalajangersagaq allanut suliamut attuumassuteqartuunngitsunut atorneqarsinnaavoq, tamanna suliamut aalajangiisuusumik isumaqassasoq ilimagineqarpat.

**§ 12.** Naalagaaffiup Sinniisuata aalajangersinnaavaa, angut, meeqqamut qularutissaanngitsumik ataataanngitsaq, aamma arnaq, meeqqamut anaanaqataasut qularutissaanngitsumik isigineqarsinnaanngitsaq, suliamut peqataajunnaassasut.

**§ 13.** Naalagaaffiup Sinniisuata suliaq eqqartuussivimmuut tunniussinnavaa

- 1) suliamut attuumassuteqartut ilaata tamanna qinnutigippagu,
- 2) Naalagaaffiup Sinniisuata suliamik suliaqarnerup ingerlatiinnaarneqarnissaa eqqarsarnartoqartippagu,
- 3) tamanut ammasumik nalunaarutiginninnikkut aggersaasoqassappat imaluunniit Kalaallit Nunaannut eqqartuussisarnermut inatsimmi § 136 malillugu eqqartuussivikkut qinnuiginnissummik suliaqartoqassappat,
- 4) suliaq tamatuma saniatigut akuersissutiginninnikkut imaluunniit Naalagaaffiup Sinniisuata unitsitsigallarnertigut inaarneqarsinnaanngippat imaluunniit
- 5) attuumassuteqartut ilaat oqartussaarnermut inatsimmi kunngip peqqussutaatigut Kalaallit Nunaannut atuutilersinneqarsimasumi § 2 malillugu oqartussaassusiagaasimappat.

*Ataataassutsimik anaanaqataassutsimillu akuersissutiginninneq*

**§ 14.** Angut meeqqamut ataataassutsimik akuersissutiginnissinnaavoq, taassuma anaanaasullu nalunaarutigippassuk, meeqqamik isumaginninneq akisussaaffillu peqatigiillutik isumagiumagitsik. Tamannali atuutissanngilaq, anaanaasoq meeqqap inunngornissaa sioqqullugu imaluunniit inunngornissaa ilimagisaasoq sioqqullugu qaammatit kingullit qulit iluanni averusersimanani katissimasimappat imaluunniit nalunaarsugaasumik aappaqarsimappat. Tamatumunnga assingusumik 1. aamma 2. pkt. atuutissapput arnap meeqqamut anaanaqataassutsiminik akuersissutiginninneranut.

*Imm. 2.* Angut meeqqap arnaanut piffissami naartulerfigisaani kinguaassiuutitigut atoqatiginnissimasoq ataataassutsimik akuersissutiginnissinnaavoq,

- 1) anaanaasoq paasissutissiissutigineqartut malillugit piffissami tassani angutunik allanik kinguaassiuutitigut atoqateqarsimannngippat aamma kinguaassiorsinnaanermut ikiorneqarluni passunneqarsimannngippat imaluunniit assingusumik passunneqarsimannngippat imaluunniit angummit allanit anisuumik tunissutaasumik ikkussivigineqarsimannngippat imaluunniit
- 2) taanna qularutissaanngitsumik meeqqamut ataataappat.

*Imm. 3.* Anaanaasoq piffissami naartulerfigisamini angutitut allanut kinguaassiuutitigut attaveqarsimappat, imaluunniit kinguaassiorsinnaanermut ikiorneqarluni passunneqarsimappat imaluunniit assingusumik passunneqarsimappat imaluunniit angummit allanit anisuumik tunissutaasumik ikkussivigineqarsimappat, angutip ataataassutsi akuersissutiginnissinnaavaa, taassuma anaanaasullu nalunaarutigippassuk, meeqqamik isumaginninneq akisussaaffillu peqatigiillutik isumagiumagitsik. Akuersissutiginninneq suliamut attuumassuteqartut sinnerinit atuuttussanngortinneqassaaq.

*Imm. 4.* Angut, § 27, § 27 a, imm. 1 imaluunniit 3, imaluunniit § 27 b malillugit meeqqamut ataataasutut isigineqartoq, ataataassutsimik akuersissutiginnissinnaavoq

- 1) anaanaasoq paasissutissiissutigineqartut malillugit piffissami tassani angutunik allanik kinguaassiuutitigut atoqateqarsimannngippat aamma kinguaassiorsinnaanermut ikiorneqarluni passunneqarsimannngippat imaluunniit assingusumik passunneqarsimannngippat imaluunniit angummit allanit anisuumik tunissutaasumik ikkussivigineqarsimannngippat imaluunniit
- 2) taanna qularutissaanngitsumik meeqqamut ataataappat.

*Imm. 5.* Arnaq, § 27 imaluunniit § 27 a, imm. 2 imaluunniit 4, meeqqamut anaanaqataasutut isigineqartoq, anaanaqataassutsiminik akuersissutiginnissinnaavoq, anaanaasoq paasissutissiissutigineqartut malillugit piffissami naartulerfigisamini angummut kinguaassiuutitigut attaveqarsimannngippat aamma kinguaassiorsinnaanermut ikiorneqarluni passunneqarsimannngippat imaluunniit assingusumik

passunneqarsimanngippat imaluunniit allanit akuerineqarluni ikkussivigineqarsimanngippat, tak. §§ 27, 27 a imaluunniit 27 b.

*Imm. 6.* Anaanaasoq piffissami naartulerfigisamini angummut kinguaassiuutitigut attaveqarsimappat, arnaq § 27 imaluunniit § 27 a, imm. 2 imaluunniit 4 malillugit meeqqamut anaanaqataasutut isigineqartoq, anaanaqataassutsiminik akuersissutiginnissinnaavoq, taassuma anaanaasullu nalunaarutigippassuk, meeqqamik isumaginnineq akisussaaffillu peqatigiillutik isumagiugagitsik. Tamanna aamma atuutissaaq, anaanaasoq piffissami naartulerfigisamini kinguaassiorsinnaanermut ikiorneqarluni passunneqarsimappat imaluunniit assingusumik passunneqarsimappat imaluunniit ikkussivigineqarsimappat, allalu passunneqarnermut akuersisimappat nalunaarsimappallu meeqqamut ataataajumalluni imaluunniit anaanaqataajumalluni, tak. §§ 27, 27 a imaluunniit 27 b. Akuersissutiginnineq peqataasut sinnerinit atuuttussanngortinneqassaaq.

*Imm. 7.* Imm. 1-6 malillugu akuersissutiginnineq allaganngorlugu pissaaq. Imm. 3 aamma 6 malillugit akuersissutiginnineq taamaallaat pisinnaavoq Naalagaaffiup Sinniisuanik ataatsimeeqateqarnermi imaluunniit inummik, Naalagaaffiup Sinniisuata ataatsimeeqatigiinnermik ingerlatsinissamut piginnaatissimasaanik, ataatsimeeqateqarnermi.

*Imm. 8.* Attuumassuteqartut ilaat oqartussaanagermut inatsimmi kunngip peqqussutaatigut Kalaallit Nunaannut atuutilersinneqarsimasumi § 2 malillugu oqartussaassuuarneqarsimappat, imm. 1-6 malillugu akuersissutiginnineq pisinnaangilaq. Ataataassutsimik imaluunniit anaanaqataassutsimik akuersissutiginnittoq ukiukitsuunini pissutigalugu oqartussaassuseqanngippat, angajoqqaatut oqartussaassusilik akuersissutiginninnermik akuersissaaq. Kalaallit Nunaannut eqqartuussisarnermut inatsimmi § 193, imm. 2, 2. pkt., assingusumik atuutissaaq.

*Imm. 9.* Imm. 1-6 malillugu akuersissutiginnineq pitinnagu, angut, ataataassutsimik akuersissutiginnittoq, imaluunniit arnaq, anaanaqataassutsiminik akuersissutiginnineq, akuersissutiginninnerup inatsisitigut kingunerinik ilisimatinneqarsimassaaq kiisalu suliap eqqartuussivimmi aalajangiivigineqarnissaanik piunasaqartoqarsinnaaneranik ilisimatinneqarsimassaaq.

*Imm. 10.* Ataataassuseq imaluunniit anaanaqataassuseq imm. 2, nr. 2, imm. 3, imm. 4, nr. 2, imm. 5 aamma 6 malillugit meeqqap inunngornissaa sioqqullugu akuersissutigineqarsinnaangilaq.

### Kapitali 3

#### *Eqqartuussivimmi ataataassutsimik anaanaqataassutsimillu suliamik sularinnineq*

##### *Suliamik suliassanngortitsineq*

**§ 15.** Suliaq taamaallaat Naalagaaffiup Sinniisuanit eqqartuussivimmut suliassanngortinneqarsinnaavoq.

##### *Suliamik sularinnineq*

**§ 16.** Anaanaasoq eqqartuussivimmut takkunnissamut kinalu meeqqamut ataataansoq imaluunniit ataataasinnaanersoq, aamma kinguaassiorsinnaanermut ikiorneqarluni passunneqarsimanerluni imaluunniit assingusumik passunneqarsimanerluni imaluunniit ikkussivigineqarsimanerluni, meeraq taamatut passussinikkut imaluunniit ikkussivigineqarnikkut pinngorsimasinnaappat, taamalu pisoqarsimappat passussinissamut imaluunniit ikkussiviginninnissamut kina akuersisimanersoq pillugu nassuiaateqarnissamut pisussaaffeqarpoq. § 8, imm. 2-5, assingusumik atuutissaaq.

**§ 17.** Eqqartuussiviup angutit arnallu, § 9-mi taaneqartut, aamma angutit imaluunniit arnat, paasisutissiissutigineqartut malillugit meeqqamut ataataasinnaasut imaluunniit anaanaqataasinnaasut, akuliutitissavai. §§ 6 b, 10 aamma 12 assingusumik atuutissapput.

**§ 18.** Eqqartuussivik suliambut attuumassuteqartut inatsisitigut ilalisatinik misissuiffigineqarnerisa ingerlanneqarnissaanik aalajangiissaaq, tamanna suliambut pingaaruteqarsinnaappat. § 11, imm. 2, assingusumik atuutissaaq.

##### *Ataataassutsimik anaanaqataassutsimillu akuersissutiginnineq*

**§ 19.** Ataataassuseq aamma anaanaqataassuseq eqqartuussivimmu akuersissutigineqarsinnaavoq. § 14 assingusumik atuutissaq.

*Ataataassutsimut aamma anaanaqataassutsimut eqqartuussut*

**§ 20.** Angut ataataasutut eqqartuunneqassaaq, inatsisitigut ilalisaatinik misissuinerup inernerata kingorna meeqqamut qularutissaanngitsumik ataataasimappat.

*Imm. 2.* Pissutsini allani angut ataataasutut eqqartuunneqassaaq, anaanaasumut piffissami naartulerfigisimasaani kinguaassiuutitigut attaveqarsimaguni, aamma pissutsinik meeqqamut ataataaneraniq ilimanarunnaarsitsisunik atuuttoqarsimanngippat. Anaanaasoq piffissami naartulerfigisamini angutinut allanut kinguaassiuutitigut attaveqarsimappat, taamatuttaaq tunngavittut piumasaqaataassaaq

1) taakkua arlaannaalluunniit inatsisitigut ilalisaatinik misissuinerup inernerata kingorna meeqqamut ataataanngitsoq imaluunniit

2) taakkua arlaannaalluunniit meeqqamut ataataanngitsut annertunertigut ilimanaateqanngitsoq.

*Imm. 3.* Imm. 2, 2. pkt., nr. 2, malillugit aalajangiisoqartillugu, anaanaasup piffissami naartulerfigisamini angutit ilaannik katissimasutut aappaqarsimanera imaluunniit inooqateqarsimanera pingaaruteqartinneqassaaq.

*Imm. 4.* Arnaq anaanaqataasussatut eqqartuunneqarsinnaavoq, taanna § 27 imaluunniit § 27 a, imm. 2 imaluunniit 4, malillugu meeqqamut anaanaqataasutut isigineqarpat.

*Imm. 5.* Angut ataataasutut eqqartuunneqarsinnaavoq, § 27, § 27 a, imm. 1 imaluunniit 3, imaluunniit §§ 27 b imaluunniit 27 c malillugit meeqqamut ataataasutut isigineqarpat.

*Imm. 6.* Meeraq kinguaassiorsinnaanermut ikiorneqarluni passunneqarnikkut imaluunniit assingusumik passunneqarnikkut imaluunniit ikkussivigineqarnikkut pinngorsimappat, aalajangiisoqarsinnaavoq angut ataataasoq, imaluunniit arnaq anaanaqataasoq, anaanaasoq angullu imaluunniit arnarlu kinguaassiorsinnaanermut ikiorneqarluni passunneqarnissaq imaluunniit assingusumik passunneqarnissaq imaluunniit ikkussivigineqarnissaq sioqullugu isumaqatigiissimappata, angut meeqqap ataatarissagaa, imaluunniit arnaq meeqqamut anaanaqataassasoq, naak § 27 aamma 27 a-mi angutip ataatatut imaluunniit arnap anaanaqataasutut isiginissaannut piumasaqaatit naammassineqarsimanngikkaluartut.

Kapitel 4

*Suliarinneqqilerneq*

**§ 21.** Meeqqamut ataataassuseq imaluunniit anaanaqataassuseq nalunaarsorneqarsimanngippat imaluunniit akuersissutiginnikkut imaluunniit eqqartuussutikkut aalajangersarneqarsimanngippat, anaanaasup imaluunniit taassuma toqusutut pigisaanik isumagittup, meeqqap imaluunniit tassunga angajoqqaatut oqartussaassusillip imaluunniit taassuma toqusutut pigisaanik isumaginnittup, angutip § 6 imaluunniit § 6 a malillugu meeqqamut ataataanermi misilinneqartinnissaanik pisinnaatitaaffeqartup, imaluunniit arnap § 6 a malillugu meeqqamut anaanaqataanermi misilinneqartinnissaanik pisinnaatitaaffeqartup qinnutiginninneratigut suliamik suliarinneqqilersoqarsinnaavoq.

*Imm. 2.* Suliarinneqqilerneq taamaallaat pisinnaavoq, angutip aalajangersimasup meeqqamut ataatanngorsinnaanera, imaluunniit arnap aalajangersimasup meeqqamut anaanaqataasunngorsinnaanera ilimagineqarsinnaanngortinneqarpat.

*Imm. 3.* Meeraq oqartussaassuseqartutut ukioqarpat, meeqqap piumasaata akerlianik suliamik suliarinneqqilersoqarsinnaanngilaq.

**§ 22.** Meeqqamut ataataassuseq nalunaarsorneqarsimappat imaluunniit akuerissutiginnikkut imaluunniit eqqartuussutikkut aalajangersarneqarsimappat, suliamik suliarinneqqilersoqarsinnaavoq, anaanaasup imaluunniit taassuma toqusutut pigisaanik isumaginnittup, meeqqap imaluunniit meeqqamut angajoqqaatut oqartussaassuseqartup imaluunniit taassuma toqusutut pigisaanik isumaginnittup isumaqatigiillutik tamanna qinnutigippassuk.

*Imm. 2.* Meeqqamut anaanaqataassuseq nalunaarsorneqarsimappat imaluunniit akuersissutiginnikkut imaluunniit eqqartuussutikkut aalajangersarneqarsimappat, suliamik suliarinneqqilersoqarsinnaavoq, anaanaasup imaluunniit taassuma toqusutut pigisaanik isumaginnittup, meeqqap imaluunniit meeqqamut



angajoqqaatut oqartussaassuseqartup imaluunniit taassuma toqusutut pigisaanik isumaginnittup isumaqatigiillutik tamanna qinnutigippassuk.

*Imm. 3.* Imm. 1 imaluunniit 2 malillugu suliarinneqqilerneq taamaallaat pisinnaavoq angutip meeqqamut ataatanngorsinnaanera imaluunniit arnap meeqqamut anaanaqataasunngorsinnaanera ilimanarsisinneqarpat.

**§ 23.** Ataataassutsimik imaluunniit anaanaassutsimik nalunaarsuinermit atatillugu kukkusoqarsimappat, kia ataatatut imaluunniit anaanaqataasutut nalunaarsorneqarneranut pingaaruteqarsinnaasumikik, anaanaasup imaluunniit taassuma toqusutut pigisaanik isumaginnittup, meeqqamut angajoqqaatut oqartussaassuseqartup imaluunniit meeqqap toqusutut pigisaanik isumaginnittup, ataataasutut nalunaarsorneqarsimasup imaluunniit taassumatut toqusutut pigisaanik isumaginnittup, anaanaqataasutut nalunaarsorneqarsimasup imaluunniit taassuma toqusutut pigisaanik isumaginnittup imaluunniit angutip imaluunniit arnap, kukkusoqarsimanera pissutigalugu meeqqamut ataataasutut imaluunniit meeqqamut anaanaqataasutut nalunaarsorneqarsimanngitsut, imaluunniit taassuma toqusutut pigisaanik isumaginnittup meeqqap inunngorneraniit ukiut pingasut qaangiutsinnagit suliamik suliarinneqqilernissaq piumasarisinnaavaat.

*Imm. 2.* Imm. 1 malillugu suliaq ataataasumit imaluunniit taassuma toqusutut pigisaanik isumaginnittumit imaluunniit anaanaqataasumit imaluunniit taassuma toqusutut pigisaanik isumaginnittumit, ataataasooq imaluunniit anaanaqataasooq kukkusoqarsimanerani ilisimasaqarluni imaluunniit ilimagisaqarluni meeraq akuersissutigisimappagu pimisut pineratigut. Suliaq aamma anaanaasumit imaluunniit taassuma toqusutut pigisaanik aqutsisumik suliassanngortinneqarsinnaanngilaq, taassuma kukkusoqarsimanerani ilisimasaqarluni imaluunniit ilimagisaqarluni ataataasooq imaluunniit anaanaqataasooq meeqqamik pimisut pinnitsissimagunigit.

*Imm. 3.* Suliaq suliareqqinneqalersinnaavoq angummit imaluunniit arnamit, § 6 b malillugu meeqqap inunngornerani nalunaarfigineqartussaasunit, nalunaarutiginninneq meeqqap inunngorneraniit qaammatit tallimat qaangiutsinnagit pineqartumut anngussimanngippat. Pineqartup meeqqap inunngornerani ilisimasaqalernerani, inunngorneranillu kingusinnerpaamiki ukiut pingasut qaangiunneranni, qinnutiginninneq saqqummiunneqassaaq pisariaqanngitsumik kinguarsaanertaqanngitsumik.

**§ 24.** Meeqqamut ataataassuseq imaluunniit anaanaqataassuseq nalunaarsorneqarsimappat imaluunniit akuersissutiginninnikkut imaluunniit eqqartuussutikkut aalajangersarnearsimappat, anaanaasup imaluunniit taassuma toqusutut pigisaanik isumaginnittup, meeqqamut angajoqqaatut oqartussaassuseqartup imaluunniit toqusutut pigisaanik isumaginnittup, ataataasup imaluunniit taassuma toqusutut pigisaanik isumaginnittup imaluunniit anaanaqataasup imaluunniit taassuma toqusutut pigisaanik isumaginnittup meeqqap inunngornerani ukiut pingasut qaangiutsinnagit suliap suliareqqinneqalernissaa qinnutigisinnaavaa, pissutsit suliamik allaanerusumik inerneqartitsisinnaasutut ilimagineqartut pillugit paasissutissanik saqqummersoqarsimappat, imaluunniit suliap allamik inerneqarumaanerata ilimaginissaanut immikkut ittunik pissutissaqarpat.

*Imm. 2.* Imm. 1 malillugu aalajangiinerni pingaartumik pingaartinneqassaaq,

1) piffissaq meeqqap inunngorneraniit qanoq sivilutigisoq ingerlasimanersoq,

2) ataataasooq pissutsinik meeqqamut ataataanerminik qulalersitsisunik ilisimasaqartoq imaluunniit ilimagisaqartoq, meeqqamik pigisamisut pinninnermigut meeqqamik akuersissutiginnissimanersoq,

3) anaanaqataasooq pissutsinik meeqqamut anaanaqataanerminik qulalersitsisunik ilisimasaqartoq imaluunniit ilimagisaqartoq, meeqqamik pigisamisut pinninnermigut meeqqamik

akuersissutiginnissimanersoq,

4) anaanaasooq pissutsinik, nr. 2 aamma 3-mi taaneqartunik, ilisimasaqarluni imaluunniit ilimagisaqarluni, ataataasumik imaluunniit anaanaqataasumik meeqqamik pigisamisut pinnitsitsisimanersoq,

5) attuumassuteqartoq pissutsinik, kia meeqqamut ataataanerani imaluunniit anaanaqataanerani qulalersitsisunik ilisimasaqartoq imaluunniit ilimagisaqartoq, piffissap pissusissamisoortup iluaniunngitsooq suliamik suliarinneqqilersitsinissamik qinnutiginnissimanersoq, aamma

6) suliaq suliareqqinneqalerpat meeqqat ataataqalernissaa imaluunniit anaanaqataasumik anaanaqalernissaa ilimagineqarsinnaanersoq.

**§ 25.** §§ 23 aamma 24 malillugit suliarinneqqilernissaa aalajangersakkani taakkunani piffissaliussap qaangiunnerata kingorna akuerineqarsinnaavoq, qinnutiginninnerup siusinnerusukkut saqqummiunneqarsimannginneranut immikkut pissutaasunik tunngavilersuuteqartoqarsinnaappat, pissutsit suliarinneqqilernissamik annertuumik tunngavissiippata aamma ilimagineqartariaqarpat, suliamik suliarinneqqilerneq meeqqamut ajoqtissanik annertuumik kinguneqarnaviannngitsooq.

**§ 26.** Suliap suliareqqinneqalissanik aalajangiineq Naalagaaffiup Sinniisuanit aalajangerneqassaaq.

*Imm. 2.* Naalagaaffiup Sininiisuata sularinneqqilernissamik apeqqut eqqartuussivimmumt suliassanngortissavaa, attuumassuteqartup Naalagaaffiup Sinniisuata aalajangiineranit sapaatip-akunneri sisamat qaangiutsinnagi tamanna qinnutigippagu.

*Imm. 3.* Suliaq suliareqqinneqalerpat, kapitali 2 aamma 3 assingusumik atuutissapput, taamaattoq tak. imm. 4.

*Imm. 4.* Angut, siusinnerusukkut suliame attuumassuteqarsimasoq, kisianni inatsisitigut ilalisaatinik misissuinerit inernerisa kingorna imaluunniit arnamut piffissami naartulerfigisaata nalaani kinguaassiuutitigut attaveqarsimanersoq pillugu uppersaait kingorna meeqqamut ataataasutut isigineqarsimanngitsoq, piuumassuserinngisaminik akuutinneqaqqissinnaangilaq. Tamannali atuutissanngilaq, pissutsit suliame pingaaruteqartut pillugit eqqunngitsumik nassuiaateqarsimappat imaluunniit taassuma ilisimasaanik kinaassutsimik paarlaassisoqarsimappat, ilalisaatinut tunngasunik atortussanik paarlaassisoqarsimappat imaluunniit assingusumik kukkusoqarsimappat.

## Kapitali 5

*Ataataassuseq, anaanaqataassuseq aamma kinguaassiorsinnaanermut ikiorneqarnikkut imaluunniit assingusumik passunneqarnikkut ikkussivigineqarnikkullu anaanaassuseq*

*Ataataassuseq aamma anaanaqataassuseq*

**§ 27.** Arnaq kinguaassiorsinnaanermut ikiorneqarluni passunneqarsimappat imaluunniit peqqinnissakkut sulisumit assingusumik passunneqarsimappat imaluunniit peqqinnissakkut sulisup akisussaaffigisaanik assingusumik passunneqarsimappat, taassuma katissimasatut aappaa, nalunaarsugaasutut aappaa imaluunniit aappaa meeqqamut ataataasutut imaluunniit anaanaqataasutut isigineqassaaq, taanna passunneqarnissamat akuersisimappat meerarlu taamaaliornikkut pinngorsimasutut isigineqartariaqarpat, taamaattoq tak. § 27 a, imm. 1. Akuersineq allaganngorlugu akuersinerussaaq angutillu meeqqamut ataataasussaaneramik, imaluunniit arnap meeqqamut anaanaqataasussaaneramik, nalunaarummik imaqqassalluni.

*Imm. 2.* Arnaq peqqinnissakkut sulisup peqataaffiginngisaanik ikkussivigineqarsimappat, taassuma katissimasatut aappaa, nalunaarsugaasutut aappaa imaluunniit aappaa meeqqamut ataataasutut imaluunniit meeqqamut anaanaqataasutut isigineqassaaq, taanna tamatumunnga akuersisimappat, meerarlu ikkussivigineqarnikkut pinngorsimasutut isigineqartariaqarpat, taamaattoq tak. § 27 a, imm. 3. Akuersineq, angutip meeqqamut ataataanissaanik, imaluunniit arnap meeqqamut anaanaqataanissaanik, nalunaarummik imaqqartussaq, immersugassamut allanneqassaaq, taannalu Naalagaaffiup Sinniisuanut nassiunneqassalluni.

**§ 27 a.** Arnaq, arnamut katissimasoq imaluunniit nalunaarsugaasumik aappaqartoq imaluunniit arnamik aappaqartoq, kinguaassiorsinnaanermut ikiorneqarluni peqqinnissakkut sulisumit passunneqarsimappat imaluunniit peqqinnissakkut sulisup akisussaaffigisaanik assingusumik passunneqarsimappat angutip ilisimaneqartup anisuuani, angut meeqqamut ataataasutut isigineqassaaq, meeraq passunneqarnermit tamatumunnga pinngorsimasutut ilimagineqarpat angutillu allakkatigut nalunaarutigisimappagu, meeqqamut ataataassalluni, taamaattoq tak. imm. 2. Arnamut passunneqartussamat katissimasatut aappaasinnaasoq imaluunniit nalunaarsugaasumik aappaasinnaasoq, passunneqarnermut allakkatigut akuersisimassaaq.

*Imm. 2.* Imm. 1-imi aalajangersagaq atuutissanngilaq, attuumassuteqartut pingasut, imm. 1-imi taaneqartut, allakkatigut nalunaarpata, arnamut passunneqartussamat katissimasatut aappaasoq, nalunaarsugaasumik aappaasoq imaluunniit aappaasoq, meeqqamut anaanaqataassasoq. Tamatuma kingorna katissimasatut aappaasoq, nalunaarsugaasumik aappaasoq imaluunniit aappaasoq meeqqamut anaanaqataasutut isigineqassaaq.

*Imm. 3.* Arnaq, arnamut katissimasoq imaluunniit arnamik nalunaarsugaasumik aappaqartoq imaluunniit arnamik aappaqartoq, angutip ilisimaneqartup anisuuani peqqinnissakkut sulisup peqataaffiginngisaanik ikkussivigineqarsimappat, angut meeqqamut ataataasutut isigineqassaaq, tamatumunnga akuersisimappat, meeraq ikkussiviginnikkut pinngorsimasutut ilimagineqarpat, angullu allakkatigut nalunaarutigisimappagu meeqqamut ataataassalluni, taamaattoq tak. imm. 4. Arnamut ikkussivigineqartussamat aappaasinnaasoq imaluunniit nalunaarsugaasumik aappaasinnaasoq, ikkussiviginninnermut allakkatigut akuersisimassaaq.

*Imm. 4.* Imm. 3-mi aalajangersagaq atuutissanngilaq, attuumassuteqartut pingasut, imm. 3-mi taaneqartut, allakkatigut nalunaarpata, arnamut ikkussivigineqartussamut katissimasatut aappaasoq, nalunaarsugaasumik aappaasoq imaluunniit aappaasoq, meeqqamut anaanaqataassasoq. Tamatuma kingorna katissimasatut aappaasoq, nalunaarsugaasumik aappaasoq imaluunniit aappaasoq meeqqamut anaanaqataasutut isigineqassaaq.

*Imm. 5.* Imm. 3 aamma 4 malillugit nalunaarut akuersinerlu immersugassamut allanneqassaaq, taannalu Naalagaaffiup Sinniisuanut nassiuunneqassalluni.

**§ 27 b.** Pissutsini, §§ 27 imaluunniit 27 a-mit pineqanngitsuni, anisuumik tunisisoq meeqqamut, taassuma anisuaanik arnamik allamik angutip katissimasatut apparinngisaanik imaluunniit apparinngisaanik kinguaassiorsinnaanermut ikiorneqarluni passussinikkut pinngorsimasumut, ataataasutut isigineqassaaq

- 1) kinguaassiorsinnaanermut ikiorneqarneq imaluunniit assingusumik passunneqarneq peqqinnissakkut sulisumit imaluunniit peqqinnissakkut sulisup akisussaaffigisaanik suliarineqarsimappat,
- 2) angut allakkatigut akuersisimappat, arnaq aalajangersimasoq passunneqarnermik tiguisuussasoq,
- 3) meeraq taamaaliornikkut pinngorsimasutut ilimagisariaqarpat aamma
- 4) angut allakkatigut nalunaarsimappat, meeqqamut ataataassalluni.

*Imm. 2.* Imm. 1 assingusumik atuutissaaq, meeraq peqqinnissakkut sulisup peqataaffiginngisaanik anisuumik tunisisup anisuaanik ikkussiviginnikkut pinngorsimappat.

**§ 27 c.** Suliani §§ 27, 27 a, 27 b imaluunniit 28-mit pineqanngitsunit, anisuumik tunisisoq meeqqamut taassuma anisuaa atorlugu kinguaassiorsinnaanermut ikiorneqarluni passussinikkut imaluunniit assingusumik passusinikkut imaluunniit ikkussivigineqarnikkut peqqinnissakkut sulisup peqataaffiginngisaanik pinngorsimasumut ataataasutut isigineqassaaq, anisooq taassuma ilisimanngisaanik imaluunniit toqunerata kingorna atorneqarsimanngippat.

**§ 28.** § 27, § 27 a, imm. 1, imaluunniit § 27 b allanik malitseqaarsimanngippat, anisuumik tunisisoq meeqqamut, taassuma anisuaa atorlugu kinguaassiorsinnaanermut ikiorneqarluni passussinikkut imaluunniit assingusumik passussinikkut pinngorsimasumut ataataasutut isigineqassanngilaq, anisooq timip ipiutaasartaanik katersuivimmut anisuunik siammarterisumut, peqqinnissakkut sulisumut imaluunniit inummut, peqqinnissakkut sulisup akisussaanerata ataani sulisumut tunniunneqarsimappat.

**§ 29.** Kapitali 1-4-mi aalajangersakkat tamatuma saniatigut assingusumik atuutissapput.

#### *Anaanaassuseq*

**§ 30.** Arnaq, meeqqamik erniarinnittoq, meeqqamut anaanaasutut isigineqassaaq.

#### Kapitali 6

##### *Taartaasumik anaanaassuseq*

**§ 31.** Arnappat meeqqamik erniarinnittup, erninerup kingorna meeqqamik inummut allamut tunniussinisanik isumaqatigiissut atorsinnaanngilaq.

#### Kapitali 6 a

##### *Angajoqqaat attuumassuteqartullu, meeqqap inunngornissaa sioqqullugu inatsisitigut suaassutsimik allannortitsisimasut*

**§ 31 a.** Kapitali 1-6-imi aalajangersakkat imm. 2 aamma 3-p malitsigisaanik allannguutit ilanngullugit angajoqqaanut attuumassuteqartunullu, § 3, imm. 6, Qitiusumik Inunnut Nalunaarsuiffik pillugu inatsisip Kalaallit Nunaannut peqqussuteqarnikkut atuutilersinneqartoq malillugu meeqqap inunngornissaa sioqqullugu inatsisitigut suaassutsimik allannortitsisimasunut atuutissapput.

*Imm. 2.* Attuumassuteqartoq, imm. 1-imi pineqartoq, ataataassutsimik anaanaqataassutsimillu suliap suliarineqarnerani pisinnaatitaaffinnik pisussaaffinnillu, pineqartup inatsisitigut suaassutsimik allannortitsinissaq sioqqullugu pigisassaraluinik, pigisaqarpoq. Taamaattoq § 27 a-mut atatillugu angut,

meeqqap inunngornissaa sioqqullugu inatsisitigut suaassutsiminik allannortitsilluni arnanngorsimasoq, arnamut kinguaassiorsinnaanermut ikiorneqarluni passunneqartussamut imaluunniit assingusumik passunneqartussamut imaluunniit ikkussivigineqartussamut arnatut katissimasatut apparisatut imaluunniit arnatut apparisatut isigineqassaaq.

*Imm. 3.* Angajoqqaq, imm. 1-imi pineqartoq, peqqussut manna malillugu meeqqamut ataataasutut imaluunniit anaanaqataasutut isigineqassaaq, meeqqap inunngornerata nalaani suaassutsini CPR-imi nalunaarsorneqarsimasoq aallaavigalugu.

**§ 31 b.** Angajoqqaq, § 31 a, imm. 3 malillugu meeqqamut ataataasutut imaluunniit anaanaqataasutut isigineqartoq, Kalaallit Nunaannut inatsisit malillugit anaanaassutsimut, ataataassutsimut aamma anaanaqataassutsimut atatillugu pisinnaatitaaffinnik pisussaaffinnillu, pineqartup inatsisitigut suaassutsimik allannortitsinerup pinnginnerani suaassutsini aallaavigalugu pigisassaraluaminik, pigisaqarpoq.

## Kapitali 7

### *Naalagaaffiup Sinnisuata ilitsersuisussaatitaanera*

**§ 32.** Naalagaaffiup Sinnisua apeqqutit, peqqussummut matumunnga attuumassuteqartut, pillugit pisariaqartumik annertussusilimmik ilitsersuisassaaq, tamatumalu saniatigut immersugassanik il.il. immersuinnermut ikiutissalluni.

## Kapitali 8

### *Aalajangersakkat assigiinngitsut*

**§ 33.** Isumaginninnermut Utoqqarnullu ministeri peqqussut manna malillugu sulianik suliarinninnermut maleruagassanik aalajangersaassaaq, tassunga ilanngullugit palasip allattaavissuarnik allattuisuusup aamma Naalagaaffiup Sinnisuata ataataassutsimik anaanaqataassutsimik nalunaarsugaannut tunngasunik, Naalagaaffiup Sinnisuata ataataassuseq aamma anaanaqataassuseq pillugit sulianik suliarinninneranut tunngasunik, piffissap anaanaasup naartulerfigisaata naatsorsorneranut, aamma inatsisitigut ilalisaatinik misissuinnermut tunngasunik. Isumaginninnermut Utoqqarnullu ministeri Naalagaaffiup Sinnisuata suliamik ingerlatsineranut naammagittaalliutit suliarineqarnerannut maleruagassanik qanimut aalajangersaasinnaavoq, tak. § 35, imm. 2.

*Imm. 2.* §§ 14, 19, 27, 27 a og 27 b malillugit immersugassat ataataassutsip aamma anaanaqataassutsip nalunaarsorneqarnissaannut atorneqartussat aamma akuersissutiginninnermut nalunaaruteqarnermullu atorneqartussat Isumaginninnermut Utoqqarnullu ministerimit akuerineqarsimasussaapput. Isumaginninnermut Utoqqarnullu ministeri aalajangiisinnnaavoq, immersugassani taakkunani atsiorerit eqqartuussissuserisumut imaluunniit ilumoortuunermut uppersaasunit marlunnit imaluunniit allatut uppersarsarneqarsimassasut.

*Imm. 3.* Isumaginninnermut utoqqarnullu ministeri aalajangiisinnnaavoq, nunani allani akuersissutiginninnermut Naalagaaffiup Sinnisuanut akuersissutiginninnermut naligitinneqassasoq.

**§ 33 a.** § 2, imm. 1, aamma § 3 b, imm. 1, malillugu nalunaarut aamma § 1 a malillugu ataataassutsip nalunaarsorneqarnissaanik qinnutiginninneq palasimut allattaavissuarnik allattuisuusumut tunniunneqassaaq digitalimik aqqiissutip, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup atugassanngortissimasaata (digitalimik imminut sullinneq), atorneqarneratigut. Nalunaarutit, digitalimik imminut sullinnikkut tunniunneqanngitsut, palasimit allattaavissuarnut allattuisuusumit itigartinneqassapput, taamaattoq tak. imm. 3 aamma 4.

*Imm. 2.* §§ 4, 5, 6, 6 a aamma 21-24 malillugu ataataassutsimik imaluunniit anaanaqataassutsimik suliaassanngortitsinissamik imaluunniit suliamik suliarinneqqilernissamik qinnutiginninneq aamma § 14 malillugu ataataassutsimik imaluunniit anaanaqataassutsimik akuersissutiginninnissamik qinnutiginninneq kiisalu § 27, imm. 2, aamma § 27 a, imm. 3-5 malillugit immersugassaaq Naalagaaffiup Sinnisuanut tunniunneqassapput digitalimik aqqiissummik, Naalagaaffiup Sinnisuata atugassanngortitaanik (digitalimik imminut sullinneq) atuinikkut. Nalunaarutit qinnutiginninnerillu, digitalimik imminut sullinnikkut tunniunneqanngitsut, Naalagaaffiup Sinnisuanit itigartinneqassapput, taamaattoq tak. imm. 3 aamma 4.

*Imm. 3.* Pissutsinik immikkut ittunik atuuttoqarpat, innuttaasut digitalimik imminut sullinnermik atuinnissamat ilimagineqanngiffigisaannik kinguneqartunik, oqartussat, tak. imm. 1 aamma 2, neqeroorutigissavaat, nalunaarutip imaluunniit qinnutiginninnerup imm. 1 aamma 2 malillugit digitalimik imminut sullinnermit allaanerusumik tunniunneqarsinnaanissaa. Oqartussat, tak. imm. 1 aamma 2, aalajangissavaat, nalunaarut imaluunniit qinnutiginniineq 1. pkt.-imi pineqartut qanoq tunniunneqassanersut, tassunga ilanngullugit taakkua oqaasiinnakkut imaluunniit allakkatigut tunniunneqassanersut.

*Imm. 4.* Oqartussat immikkut illuinnartumik pissutsit imm. 3-mi taaneqartut saniatigut nalunaarummik imaluunniit qinnutiginninnermik, digitalimik imminut sullinnikkut tunniunneqarsimanngitsunik, itiggartitsinngissinnaapput, aningaasaqarnikkut ataatsimoortumik naliliineq aallaavigalugu nalunaarutip imaluunniit qinnutiginninnerup digitaliuungitsumik allatut tigusissaa oqartussanut erseqqissunik iluaqutissartaqarpat.

*Imm. 5.* Digitalimik nalunaarut imaluunniit qinnutiginnineq apuussimasutut isigineqassaaq oqartussanit tiguneqarsinnaalerpat.

**§ 34.** Danmarkimi naalakkersuisut naalagaaffinnut allanut isumaqatigiissuteqarsinnaapput Danmarkimi aamma nunat allat akornanni meeqqamut ataataassutsip, anaanaqataassutsip aamma anaanaassutsip aalajangersarneqartarneranut inatsisitigut maleruagassat pillugit pissutsinik. Isumaqatigiissut Lovtidendemi nalunaarutiginninnerup kingorna Kalaallit Nunaanni atuutissaaq.

*Imm. 2.* Isumaginninnermut utoqqarnullu ministeri meeqqamut ataataassutsip, anaanaqataassutsip anaanaassutsillu aalajangersarneqartarneranut Danmarkimi aamma nunat avannarliit allat akornanni maleruagassat pillugit pissutsit pillugit maleruagassanik aalajangersaasinnaavoq.

**§ 35.** Peqqussut manna malillugu Naalagaaffiup Sinnisuata aalajangiineri allaffissornikkut oqartussamut allanut ingerlateqqinneqarsinnaanngillat.

*Imm. 2.* Kapitali 2, 4 aamma 5 malillugit suliani Naalagaaffiup Sinnisuata suliamik suliarinninnera Isumaginninnermut Utoqqarnullu ministerimut naammagittaalliutigineqarsinnaavoq.

## Kapitali 9

### *Atuutilersinneqarnera il.il.*

**§ 36.** Peqqussut atuutilersinneqassaaq ulloq [dato], taamaattoq tak. 2. pkt. Isumaginninnermut Utoqqarnullu ministeri § 33 a-p atuutilersinneqarnissaanut ullormik aalajangersaassaaq.

*Imm. 2.* Peqqussut meeqqanut, peqqussutip atuutilerana sioqqullugu inunnorsimasunut, atuutissanngilaq, taamaattoq tak. imm. 4-6. Meeqqanut taakkununga maleruagassat maannamut atuuttut atuutissapput, taamaattoq tak. imm. 3.

*Imm. 3.* § 22-mi aalajangersagaq, tak. § 26, meeqqanut peqqussutip atuutilerana sioqqullugu inunnorsimasunut, aamma atuutissaaq.

*Imm. 4.* § 20, imm. 6, atuutissanngilaq, kinguaassiorsinnaanermut ikiorneqarluni passunneqarneq imaluunniit assingusumik passunneqarneq imaluunniit ikkussivigineqarneq peqqussutip atuutilerana sioqqullugu pisimappata.

*Imm. 5.* §§ 27, 27 a aamma 27 b meeqqanut kinguaassiorsinnaanermut ikiorneqarnikkut imaluunniit assingusumik passunneqarnikkut imaluunniit ikkussivigineqarnikkut pinngorsimasunut atuutissanngillat, tamatumunnga akuersineq meeqqamullu ataataanissamik imaluunniit anaanaqataanissamik nalunaarut peqqussutip atuutilernissaa sioqqullugu pisimappata.

*Imm. 6.* §§ 27 c aamma 28 atuutissanngillat, kinguaassiorsinnaanermut ikiorneqarluni passunneqarneq imaluunniit assingusumik passunneqarneq imaluunniit ikkussivigineqarneq peqqussutip atuutilernissaa sioqqullugu pisimappata.

**§ 37.** (Peqqussummi matumani Kalaallit Nunaannut atuutilersinneqassanngilaq)

**§ 38.** (Kalaallit Nunaannut atuutilersinneqassanngilaq)

**§ 39.** Peqqussutit meeqqat pillugit inatsisip malitsigisaanik pilersinneqartut Kalaallit Nunaannut atuutinngillat.

\*\*\*

*Imaasa allassimaffiat*

- Kapitali 1 Erninermut atatillugu ataataassutsimik nalunaarsuineq
- Kapitali 1 a Erninermut atatillugu anaanaqataassutsimik nalunaarsuineq
- Kapitali 2 Naalagaaffiup ingerlatsiviani ataataassutsimik aamma anaanaqataassutsimik suliaq
- Kapitali 3 Eqqartuussivimmi ataataassutsimik aamma anaanaqataassutsimik suliaq
- Kapitali 4 Suliarinneqqilerneq
- Kapitali 5 Kinguaassiorsinnaanermut ikiorneqarnermi imaluunniit assingusumik passunneqarnermi aamma ikkussivigineqarnermi ataataassuseq, anaanaqataassuseq aamma anaanaassuseq
- Kapitali 6 Taartaasumik anaanaassuseq
- Kapitali 6 a Angajoqqaat aamma attuumassuteqartut, meeqqap inunngornera sioqqullugu inatsisitigut suaassutsimik allanngortitsisimasut
- Kapitali 7 Naalagaaffiup ingerlatsiviata ilitersuisussaataitanera
- Kapitali 8 Aalajangersakkat assigiinngitsut
- Kapitali 9 Atuutilernera il.il..

---

<sup>1</sup> Aalajangersagaq ima oqaasertaqarpoq: »Inatsit Savalimmiunut Kalaallit Nunaannullu atuutinngilaq, kisiannili kunngip peqqussutaatigut nunap immikkoortuinut taakkununnga atuutilersinneqarsinnaalluni, allanngutit Savalimmiuni Kalaallit Nunaannilu pissutsinit piumasarineqartut tunngavigalugit.«

<sup>2</sup> Aalajangersagaq ima oqaasertaqarpoq: »Inatsit Savalimmiunut Kalaallit Nunaannullu atuutinngilaq, kisiannili kunngip peqqussutaatigut nunap immikkoortuinut taakkununnga tamakkiisumik ilaannakuusumilluunniit atuutilersinneqarsinnaalluni, allanngutit Savalimmiuni Kalaallit Nunaannilu pissutsinit immikkut ittunit piumasarineqartut tunngavigalugit.«

<sup>3</sup> Aalajangersagaq ima oqaasertaqarpoq: »§§ 1, 9, 10, 11 aamma 14 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

---

<sup>4</sup> Aalajangersagaq ima oqaasertaqarpoq: »Inatsimmi §§ 1-4 aamma 7 kunngip peqqussutaatigut Savalimmiunut Kalaallit Nunaannullu tamakkiisumik ilaannakuusumilluunniit atuutilersinneqarsinnaapput, allannguutit Savalimmiuni Kalaallit Nunaannilu pissutsinit piumasarineqartut tunngavigalugit.«

<sup>5</sup> Aalajangersagaq ima oqaasertaqarpoq: »§§ 3 aamma 4 aamma § 6, nr. 1 aamma 3, kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

<sup>6</sup> Aalajangersagaq ima oqaasertaqarpoq: »Inatsit Savalimmiunut Kalaallit Nunaannullu atuutinngilaq, kisiannili kunngip peqqussutaatigut nunap immikkoortuinut taakkununga tamakkiisumik ilaannakuusumilluunniit atuutilersinneqarsinnaalluni, allannguutit Savalimmiuni Kalaallit Nunaannilu pissutsinit immikkut ittunit piumasarineqartut tunngavigalugit.«

<sup>7</sup> Aalajangersagaq ima oqaasertaqarpoq: »§§ 5-9 aamma 15 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

<sup>8</sup> Aalajangersagaq ima oqaasertaqarpoq: »§§ 1-4, 7, 8 aamma 11 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

<sup>9</sup> Aalajangersagaq ima oqaasertaqarpoq: »Imm. 4. §§ 1-4, 6-12, 17-20, 27 aamma 39 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

<sup>10</sup> Aalajangersagaq ima oqaasertaqarpoq: »§§ 1-9 aamma 11 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«

<sup>11</sup> Aalajangersagaq ima oqaasertaqarpoq: »§§ 1-5 aamma 7 kunngip peqqussutaatigut Kalaallit Nunaannut tamakkiisumik ilaannakuusumilluunniit atuutilersinneqarsinnaapput, allannguutit Kalaallit Nunaanni pissutsinit piumasarineqartut tunngavigalugit.«